

Тыва Республиканың өөредилге, эртем  
болгаш аныктар политиказының ямызы

Национал школа хөгжүдөр институт



ББК С(ТУВ)  
А 98

Чурук каасталгазы *Начын Шалыктыы*

© Чурук каасталгазы Н.Шалык, 2009  
© Национал школа хөгжүдөр институт, 2009



## АШАК, КАДАЙ БОЛГАШ АЛДЫН КУШКАШ

Ашак, кадай чурттап чораан иргин. Ашак ыяштап чорааш, ортузу ирип хозаан төшке чеде берген. Өл бе, кургаг бе дээш, балдызы-биле кагарга, төштүң хозундан алдын кушкаш үне халып келгеш:

– Чүү херегил, ашак? – дээн.

Ашак кайгап-харап тура:

– Ыяш херек – деп харыылаан.

– Ындыг болза ыяштавайн чана бер, ашак, мен ыяштап берейн – дээр мындыг алдын кушкаш бооп-тур.

Ашак, бо кандыг аайлыг алдын кушкажыл, шын, мегезин көөр-дүр дээш чанып келген.

Кадайы олура:

– Чүге куруг келдиң, чалгаапай! – дээш кончуй-ла берген.

Ашак:

– Хос төштү кагарымга, алдын кушкаш үнүп келген. «Чүү херек, ашак?» дээрге, ыяш херек дидим. «Чана бер, мен ыяштап берейн» дээрге, шын, мегезин көөр дээш, чанып келдим, кадай – дээн.

Ындыг-дыр дишкеш, удуп чыдып алганнар.

Эртен туруп келирге, багай өөнүң дашты чер-чери-биле ос-хорум ыяш болган.

Ашак бо кандыг аайлыг чүве болду дээш, шайын иже шаап алгаш, балдызын туткаш, арыгже чоруп каан. Хос төжүнгө келгеш, оозун балды-биле кагарга, алдын кушкажы үнө халып келгеш:

– Чүү херегил, ашак? – дээн.

– Ак өг, аъш-чем, кижиниң бүгү эдилели херек – дээн.

Алдын кушкажы олура:

– Шупту чүве белен, бар болур, чоруй бар, кырган – дээрге, ашак чана берген.

Кежээ апаарга, ашак, кадай, аас-кежиин манап удуп чыдып алгаш, эртен оттуп келирге, каас ак өгнүң иштинде эңдерик аъш-чем, эт-эдилел, идик-хеп ортузунда чытканнар.

Ашак аъш-чемин ижип-чип алгаш, балдызын туткаш, база-ла арыгже чоруп каан. Хос төжүн балды-биле каккан. Алдын кушкаш үнө халып келгеш:

– Чүү херегил, ашак? – дээн.

Ашак:

– Беш чүзүн мал херек – дээн.

Алдын кушкаш биеэги-ле чаңы-биле «чана бер» дээрге, ашак чоруй барган.

– Алдын кушкажың бар-дыр бе, чүнү чугаалаштыңар? – деп, кадайы ашактан айтырган.

Ашак:

– Беш чүзүн мал херек дидим. «Чана бер, ашак» дээрге, чанып келдим – дээн-даа иргин.

Даартазында эртен оттуп келирге, беш чүзүн мал кодан сыңмас аалаан-чиилээн туруп-тур эвеспе. Ол хүн ирей, кадай кайнаар-даа баар чай чок, малын

ончалап, киирер кажаа, баглаар баг тып чадап тура хүнзээн.

Даартазында ашак кадайындан:

– Ам биске чүү херегил? – деп айтырган.

Кадайы:

– Эмин эрттир ажырымнап турган херээ чок, эт-севичис-даа, аъш-чемивис-даа, мал-маганывыс-даа амыдыраарынга четчир-дир – деп харыылап турган.

Ашак тургаш:

– Тенээңни кадай, ам-даа херек чүве хөй, сен кадын, мен хаан болуйн, чагырар-дужаар хөй албаты херек – деп барган.

Кадай:

– Ынчап-ла тенип, бажың эъттене бербе, ашак – деп турбуже, ашак-даа балдызын туткаш, арыгдыва чоруп каап-тыр эвеспе.

Ашак хос төжүнге чеде бергеш, балдызы-биле дырт кылган. Алдын кушкаш үне халып келгеш:

– Ам чүү херегил, ашак? – дээн.

– Кадайым кадын болзун, бодум хаан болуйн, чагырар-дужаар хөй албаты кижилер херек – деп-тир эвеспе.

Алдын кушкаш чүве-даа ыттавайн, хос төжүнүң иштинче кире берген.


Ашак ол-бо хап улдаан, шимээн чок. Чоп хоранныг чоор дээш, төштүң бодун, дазылдарын дөгerezин чарып көргөн, чүве-даа чок болган. Ашак аалынга муңгаргай кылаштап кээрге кадайы олура:


– Чүү болдуң? – деп айтырарга, ашак болган чүүлдү дөгerezин чугаалап берген.

Кадайы-даа:

– Катап ядараанывыс ол-дур, чүге кижичи сөзү дыңнаваc кижичи сен – деп, кончуп пат-ла болган-дыр эвеспе.


Кежээ дүжүп келирге, ашак, кадай удуп чыдып алгаш, эртен туруп келирге, чүү-даа чок, «артык сагыш ара дүжер» дээн ышкаш, биеэги-ле самдар өөндө ийи боттары чыткан-даа чүвең иргин.




























*Литературно-художественное издание*

**СТАРИК, СТАРУХА И  
ЗОЛОТАЯ ПТИЧКА**

Тувинская народная сказка

Для детей младшего возраста

На тувинском языке

Ответственный за выпуск *У.П. Допул*

Редактор *О.М. Баир*

Художник *Н.К. Шалык*

Художественный редактор *М.Ч. Чооду*

Компьютерная верстка *Л.Д. Донгак*

Корректор *В.С. Кара-Сал*

Подписано в печать 24.12.2009. Формат 60x84<sup>1</sup>/<sub>8</sub>.

Бумага мелованная. Гарнитура TTSchoolBook.

Физ. печ.л. 2,5. Тираж 1000 экз. ТП 2009. Заказ № 270.

Макет изготовлен в издательско-полиграфическом  
отделе «Билиг»

Института развития национальной школы  
Министерства образования, науки и  
молодежной политики Республики Тыва.  
667011 г. Кызыл, ул. Калинина, 16

Отпечатано в ГУП Республики Тыва «Тываполиграф»  
667000 г. Кызыл, ул. Щетинкина и Кравченко, 1